

Samostalna zastupnica - Arijana Memić

Samostalna zastupnica - Elza Gaković

Narod i pravda - Mersiha Mehmedagić

Sarajevo, 09.08.2025. godine

ZA:

BOSNA I HERCEGOVINA

FEDERACIJA BOSNE I HERCEGOVINE

KANTON SARAJEVO

SKUPŠTINA KANTONA SARAJEVO

- Vlada Kantona Sarajevo

U skladu sa članom 106. i 213. Poslovnika o Skupštine Kantona Sarajevo, dostavljamo:

ZASTUPNIČKA INICIJATIVA

Prijedlog za imenovanje Fondacije lokalne demokratije (Sigurna kuća) udruženjem od posebnog interesa za Kanton Sarajevo.

Za ovu inicijativu tražimo izjašnjenje Skupštine Kantona Sarajevo

OBRAZLOŽENJE

Obraćamo Vam se prijedlogom za imenovanje Fondacije lokalne demokratije (FLD) udruženjem od posebnog interesa za Kanton Sarajevo.

Fondacija lokalne demokratije je lokalna nevladina organizacija sa više od 28 godina kontinuiranog rada i iskustva u provođenju aktivnosti usmjerenih ka kreiranju pravednijeg, odgovornijeg i inkluzivnijeg društva.

Temeljni fokus djelovanja usmjeren je na zaštitu, promociju i unapređenje ljudskih prava, s posebnim naglaskom na prava žrtava rodno zasnovanog nasilja. Kroz unapređenje zakonodavnog okvira, te provođenjem socijalnih, ekonomskih i obrazovnih programa, Fondacija doprinosi osnaživanju žena u Bosni i Hercegovini, omogućavajući im ravnopravno učešće u javnom i privatnom životu.

Programi rada i djelovanja FLD-a usmjereni su na prevenciju, zaštitu i aktivizam protiv rodno zasnovanog nasilja, s ciljem poboljšanja statusa i položaja žrtava porodičnog nasilja, seksualnog nasilja u ratu, ali i u mirnodopskim uslovima.

Dugogodišnji rad na zaštiti prava žena, posebno žena žrtava rodno zasnovanog nasilja, rezultirao je uspostavljanjem i upravljanjem Sigurnom kućom, jedinom takvog tipa na području Kantona Sarajevo. Sigurna kuća počela je s radom 2000. godine, a danas djeluje kroz dva funkcionalna skloništa:

1.Sklonište za žene i djecu žrtve nasilja u porodici (kapacitet 25 mjesta: 10 žena i 15-ero djece);

2.Sklonište za djevojke žrtve seksualnog zlostavljanja, incesta, silovanja i porodičnog nasilja, aktivno od 2002. godine, namijenjeno djevojkama uzrasta od 12 do 18 godina, državljankama Bosne i Hercegovine (kapacitet 10 mjesta).

U okviru Sigurne kuće uspostavljena je i sljedeća usluga podrške:

SOS crvena linija (033/222 000) - telefonska linija za 24-satnu prijavu nasilja u porodici, koja neprekidno djeluje od marta 2004. godine. Putem SOS telefona moguće je prijaviti nasilje, ali i dobiti osnovne informacije o načinu prijave nasilja, te uslugama podrške za žrtve nasilja u porodici.

Značaj i doprinos Sigurne kuće u Sarajevu, koja je jedna od samo osam takvih institucija u cijeloj Bosni i Hercegovini, najbolje potvrđuju statistički podaci:

Od 2000. godine do kraja aprila 2025. godine, Sigurna kuća zbrinula je 2.506 žrtava nasilja u porodici (žene, djeca i djevojke);

U periodu od marta 2004. godine, pa do kraja aprila 2025. godine, evidentirano je 18.735 poziva putem SOS linije.

Pored fizičke zaštite, Sigurna kuća osigurava i psihosocijalni tretman korisnicama, s ciljem prevazilaženja traumatskih iskustava. Stručno osoblje radi na jačanju samopouzdanja i samopoštovanja žrtava, razvoju socijalnih vještina, te njihovom ekonomskom osnaživanju i pripremi za samostalniji život nakon izlaska iz skloništa.

Fondacija lokalne demokratije također je osnovala i upravlja Centrom za žene, koji pruža besplatnu pravnu, psihološku i socio-ekonomsku pomoć ženama žrtvama porodičnog nasilja, žrtvama rata, samohranim majkama, te ženama koje se nalaze na marginama društva, građankama Kantona Sarajevo, koje ne borave u Sigurnoj kući ili su izašle iz nje, te im je neophodna daljnja psihološka i pravna podrška.

Uz programe psihičkog osnaživanja, pravnog savjetovanja i zastupanja, a potom i ekonomsku podršku, korisnice također imaju mogućnost osposobljavanja za tržište rada, razvoja vlastitih malih biznisa, te same ekonomski doprinose vlastitim domaćinstvima. Centar za žene itekako je funkcionalan, a godišnje njegove usluge podrške koristi blizu 500 korisnica.

Fondacija lokalne demokratije je, kao organizacija civilnog društva, još 2005. godine potpisala Protokol o radu i saradnji Koordinacionog tijela za prevenciju, zaštitu i borbu protiv nasilja u porodici u Kantonu Sarajevo, a koji ima za cilj uspostavljanje multidisciplinarnе saradnje njenih potpisnica radi unapređenja prevencije i zaštite žrtava nasilja u porodici. Fondacija lokalne demokratije kao članica ovog tijela ima veoma istaknutu ulogu u njegovom funkcioniranju, te godinama unazad aktivno sarađuje sa institucijama u KS i direktno doprinosi prevenciji i smanjenju nasilja.

Dugogodišnji rad i zalaganje Fondacije lokalne demokratije za prava žrtava nasilja na osnovu spola prepoznalo je i Ministarstvo za rad, socijalnu politiku, raseljena lica i izbjeglice KS, te je u augustu 2021. godine potpisan Sporazum o smještaju socijalno ugroženih osoba žrtava nasilja u porodici u Sigurnu kuću. Potpisivanjem ovog Sporazuma, Vlada KS preuzela je finansiranje troškova boravka korisnica u Sigurnoj kući, čime je iskazala svoje podršku, ali i povjerenje Fondaciji lokalne demokratije.

Uvažavajući dosadašnji doprinos Fondacije lokalne demokratije u oblasti zaštite ljudskih prava, a naročito prava žena i djece, te našu stratešku ulogu u razvoju sistema podrške žrtvama nasilja u Kantonu Sarajevo, smatramo da ispunjavaju sve kriterije za sticanje statusa udruženja od posebnog interesa za Kanton Sarajevo.